

I te 'ōmuara'a nō te 'āva'e tiunu, mai te 'anapa uira ra te parau 'āpī i te ma'irira'a mai i ni'a i te nuna'a Mā'ohi ē : 'ua fa'a'orehia nā mua, ē, 'ua fa'ataimehia nā muri mai, te tāpurara'a i'oa ō te mau pīahi e titau ra e tata'u nō te parau tū'ite teitei nō te ha'api'ira'a i te mau reo Mā'ohi, pī'ihia te « CAPES ».



'Ua tupu te ahoaho i roto roa i te mau 'utuāfare. I muri i te reira, 'ua ti'a te mau pīahi 'o tei ineine roa nō taua tāpurara'a i'oa ra 'e tā rātou ato'a mau 'orometua i pīha'i iho iā rātou. Ē, nā muri atu iā rātou, te mau Vāna'a nō nā fare e toru : tō Tahiti, tō te Fenua Enata, tō te Tuāmotu, te Fa'aterera'a Hau nō te ta'ere 'e te faufa'a tumu ē te mau pīha toro'a atoa tā na e ti'a'au ra, te mau ta'atira'a pāruru i te mau reo Mā'ohi, te mau ta'atira'a e ha'a ana'e ra nō te ta'ere, te mau pupu 'ori ē, rave rau noa atu...

I tōna pae ē, nā ni'a i tō na ti'ara'a tōro'a pāruru, ha'afaufa'a 'e fa'afa'a'ite i te mau reo tumu ō te Fenua nei, 'ua 'āfa'i atu te Pū nō te ta'ere 'e nō te faufa'a tumu i tā na turura'a rū nā roto i te ha'api'ira'a 'e te fa'a'otora'a i te hīmene i ma'irihia : **Tō 'u reo** 'o tei pāpā'ihia 'e te rohiphe tuiro'o ra Patrick AMARU tāne 'e tā-reo-hīmene-hia 'e Teva PANI tāne. E taime poto roa i te ha'api'ira'ahia taua hīmene ra, 'ua roa'a rā i te hīmene-tāmu-'āmui-hia i te roara'a nō te avatea mahana toru 15 nō tiunu i ni'a i te tahua Taraho'i 'ei fa'aitoitōra'a i te mau titaura'a tano ā te mau pīahi.



Nō te fa'anahora'a **'A ti'a nō tō 'oe reo**, e fa'atupuhia ra i te mahana mā'a 25 nō tiunu i roto i te 'Āua ori-haere-ra'a nō Pa'ofai, nā muri i te mau Tī'a arai nō tō tātou mau reo 'e nō te ta'ere Mā'ohi, tē ha'apa'o nei te Pū nō te ta'ere 'e nō te faufa'a tumu i te fa'ataera'a i te mau titau-manihini-ra'a ā te Tomite fa'aineine i taua fa'anahora'a ra, i rotopū i te mau ta'atira'a ato'a nō te mau ta'amotu tāta'i tahi ō te Fenua nei, 'ia 'āmui tahi tō rātou mau mero i roto i te mau ha'aputuputura'a ato'a e fa'anahohia nō taua tumu 'ōhipa ra i roto i tō rātou mau motu tāta'i tahi.

